

# Tèris

(texte : Jean-Pierre Clovin ; musique : Jean-Pierre Clovin et Georges Legrand)

1. Tèris,  
monchas d'travây,  
monumints aus-oûyeûs,  
on vos wèt si voltî !

Vos-astèz  
l' souv'nance d'èl' fôrtune  
satchiye pa l' misère  
pou bourér lès stûves.

Vos d'mèrèz  
pou rap'lér  
l' dure bèsogne  
dès fostîs

qui fét  
qu'on èst-ôssi fièrs  
di diskinde du tchèbon  
qu' d'ène grande vile di rwès !

Pou l' glwère di nos-oûyeûs,  
dji dimande à tèrtous  
d' lèyî vikî nos vîs tèris.

2. Tèris,  
lès djèts d'èl' fosse  
èt lès nwèrès molètes  
vos-ont fét grandi.

Seûchèz  
qu'à chaque côp qu'in pi  
findeut n' win.ne di oûy  
dins l' fond du bougnou,

c'asteut  
n' miyète di sang  
qui coureut  
wôrs dès bras

du cén  
qui vuoleut bén  
donér s' vikériye  
pou lès stûves, lès fournias !

Pou l' z-èrmèrcyî,  
pou l' glwère di nos-oûyeûs,  
dji dimande à tèrtous  
d' lèyî vikî nos vîs tèris.

3. Tèris,  
vos nwèrs ronds tiènes  
astént in vré calvére  
pou lès feumes di vos pas !

I n' faut  
nén roubliyî  
lès ramasseûses  
qui d'ont tant soufru

pou prinde  
vos mèyeûs cayôs  
dins leûs satches,  
su leû dos

ployi  
d'zous leû fardia  
en sclidant en bas  
en s'prouvant d' fé in pas.

Pou cès misères momans,  
pou l' z-èrmèrcyî,  
pou l' glwère di nos-oûyeûs,  
dji dimande à tèrtous  
d' lèyî vikî nos vîs tèris.

4. Tèris,  
avou tant d'èfants,  
dj' vos passeus au d'zeûr  
pou dalér djouwér :

vos-astîz  
l' paradis  
pou trouvér l' muchète  
pou nos tchats-muchis !

Pa côps,  
sins l' fé èsprès,  
on tchèyeut  
tout d'in côp

su n' coupe  
d'amoureux  
èt c'asteut l' rèmonç'lâdje  
pa l' cén qu' l'aveut vèyu !

5. Tèris,  
come on d'vént vî :  
on l' wèt bén quand lès-ârbes  
vos-ont flori d'sus.

Pa côps,  
vos-astèz in grand bos  
qui mèt n' miyète di vèrt  
dins no Nwèr Payis.

C'est come  
pou nos muchî  
l'misère dès slaves  
qu'ont boutè

qu'on vout  
vos côpér à ras'  
èt vos rinde à l' tère  
pou fé dès grandès vôyes !

Pou l' souv'nance dès slaves,  
Pou lès djeus dès-èfants,  
pou cès misères momans,  
pou l' z-èrmèrcyî,  
pou l' glwère di nos-oûyeûs,  
dji crîye waût à tèrtous :  
« Lèyèz vikî nos vîs tèris ! »